

Izjava OHR-a na konferenciji za medije međunarodnih organizacija

Saradnja sa Međunarodnim krivičnim tribunalom (ICTY)

Prije svega nekoliko napomena u vezi sa akcijom koju su u RS tokom vikenda poduzeli SFOR i policija RS. Visoki predstavnik je u više navrata izjavio da je pritvaranje optuženih za ratne zločine i njihovo prebacivanje u Haški tribunal od suštinskog značaja ukoliko se želi postići stvarno pomirenje u BiH. Također, pružanje pomoći u pritvaranju istih predstavlja međunarodnu obavezu organa vlasti BiH. Suđenje optuženima za ratne zločine, a ovo se naročito odnosi na ratne vođe kao što su Ratko Mladić i Radovan Karadžić, je jedini način utvrđivanja pojedinačne odgovornosti za ratne zločine i određivanja odgovarajuće kazne za iste, na taj način oslobađajući svaki pojedinačni narod od nepravičnog tereta kolektivne krivnje. Visoki predstavnik konstatuje da učešće policije RS u akciji izvedenoj ovog vikenda ukazuje na činjenicu da organi vlasti RS počinju konačno da ispunjavaju svoju zakonsku obavezu da sarađuju u potpunosti sa Međunarodnim krivičnim tribunalom (ICTY), te očekuje da se ova saradnja intenzivira do hapšenja Karadžića.

Pismo visokog predstavnika u vezi sa pitanjem Mostara

Visoki predstavnik, Paddy Ashdown, je odgovorio na pismo koje su mu 9. januara uputili zamjenik predsjedavajućeg Zastupničkog doma Parlamenta Federacije, Josip Merdžo, te premijer Kantona 7, Miroslav Ćorić. U pismu koje su uputili, gospodin Merdžo i gospodin Ćorić su iskazali svoja mišljenja o pitanju Statuta Mostara koje još nije rješeno.

Visoki predstavnik je u svom odgovoru koji je uputio danas

iskazao svoju nadu da dva neriješena pitanja – izborni sistem i pitanje da li treba zadržati Općine – mogu biti riješena konsenzusom. Visoki predstavnik je ponovo iskazao svoju odlučnost da osigura takvo rješenje, te je rekao da je spreman “da učini sve što je u njegovoj moći” kako bi ovo postigao.

Visoki predstavnik je također konstatirao da ukoliko se ne postigne konsenzus u roku od sljedeće dvije sedmice, odluka će bez obzira na to morati da se donese kako bi na vrijeme započele pripreme za izbore koji će se održati u oktobru, te da će morati da poduzme odgovarajuće mjere kako bi osigurao da se to uradi.

Visoki predstavnik je izjavio da je zatražio od tima stručnjaka da dalje prouče predloženi izborni sistem uzimajući u obzir komentare koje je dala stranka HDZ po ovom pitanju. Međutim, visoki predstavnik je dodao da ukoliko HDZ odabere da upotrijebi argument da u Mostaru “bošnjački glas vrijedi više od hrvatskog glasa”, onda se isti argument mora primijeniti i drugdje u BiH. Logično, zaključak bi bio da u BiH kao cjelini, hrvatski glas vrijedi tri ili četiri puta više od bošnjačkog glasa kada su u pitanju, na primjer, izbori u Predsjedništvo BiH. Visoki predstavnik pita da li se HDZ može opravdano protiviti u Mostaru sistemu od kojeg Hrvati imaju korist u BiH?

Čini se da je stav HDZ-a da se interesi manjinskih naroda u Mostaru mogu zaštititi na adekvatan način isključivo pozivanjem na vitalni nacionalni interes. Ovo, rekao je visoki predstavnik, predstavlja prilično iznenađujući stav koji dolazi iz HDZ-a. Visoki predstavnik ne može razumjeti zašto HDZ smatra neprihvatljivim da drugi narodi u Mostaru imaju višestruke zaštite koje HDZ zahtijeva za hrvatski narod u BiH kao cjelini.

Visoki predstavnik konstatuje da je HDZ od početka prihvatila princip da u konačnom rješenju pitanja Mostara nijednom pojedinom narodu ne treba omogućiti da dominira gradom. Po

mišljenju Komisije ne postoji drugi način da se ovo uradi osim putem izbornog sistema. Ukoliko HDZ ima konkretne prijedloge za alternativne načine da se ovo ostvari, u skladu sa osnovnim principom koji su uključene strane već usaglasile unutar Komisije, OHR će sa zadovoljstvom saslušati te prijedloge.

Kopije pisma visokog predstavnika možete naći na stolu izvan ove sale.

Prvi zamjenik visokog predstavnika, premijer Hadžipašić i kantonalni premijeri će se sastati u OHR-u

Danas poslijepodne u prostorijama OHR-a, premijer Federacije Ahmet Hadžipašić i prvi zamjenik visokog predstavnika Don Hays će predsjedavati sastankom na kojem će učestvovati svih deset kantonalnih premijera. Ministar finansija Dragan Vrankić i ministar za energetiku Izet Žigić će također učestvovati na sastanku. Cilj ovog sastanka je da se istraže načini na koje kantoni mogu u najvećoj mjeri poboljšati svoje mogućnosti s ciljem jačanja ekonomskih reformi i ekonomskog razvoja. Ovo će biti sastanak koji će trajati dva sata i biće praktičnog karaktera. Na kraju sastanka će se održati konferencija za novinare, u 15:30 sati danas, na kojoj će učesnici najaviti, između ostalog, ono što namjeravaju uraditi da bi ubrzali ponovno pokretanje procesa privatizacije u BiH. Donio sam duže obavještenje za medije, sa svim detaljima.

TV Pretplata

OHR sa žaljenjem konstatira nemogućnost Vlade Federacije da na jučerašnjoj sjednici postigne dogovor da bi preduzeća za telekomunikacije trebala djelovati kao agencija za naplatu RTV pretplate. Uspostavljanje efikasnog sistema pretplate predstavlja suštinski element pri osiguranju da BiH dobije javni RTV sistem koji će biti neovisan u finansijskom smislu i u smislu uređivačke politike. Ovo predstavlja ključni uslov iz Studije izvodljivosti Evropske komisije, te je zbog toga prioritet za daljnje evropske integracije. Uvjereni smo da

Vlada Federacije ne želi postati prepreka na putu ove zemlje u Evropu, te apeliramo na njih da što je prije moguće dođu do rješenja u interesu svih građana BiH.